

IZVJEŠTAJ
O RADU PRAVOBRANILAŠTVA
KANTONA SARAJEVO
za period 01.01.2024. do 31.12.2024. godine

Sarajevo, februar 2025. godine

SADRŽAJ:

UVOD.....	3
NADLEŽNOSTI PRAVOBRANILAŠTVA.....	3
ZASTUPANJE.....	3
STRUČNA POMOĆ I DAVANJE MIŠLJENJA.....	4
ZAKONSKI OSNOV	4
POSTUPCI PRED SUDOVIMA I POSLOVI ZASTUPANJA.....	5
PODACI O KRETANJU PREDMETA.....	6
PARNIČNI POSTUPAK "P"	7
ZNAČAJNIJE PARNICE U 2024. GODINI.....	8
Značajnije parnice iz oblasti radno-pravnih sporova.....	8
Značajnije parnice iz oblasti obligaciono-pravnih sporova – naknada štete.....	11
Predmeti u kojima Kanton Sarajevo potražuje isplatu duga na ime koncesione naknade za eksploataciju.....	13
Značajniji postupci iz oblasti imovinsko-pravnih odnosa.....	14
IZVRŠNI POSTUPAK.....	16
IZVRŠNI POSTUPAK ZA NAPLATU SUDSKE TAKSE.....	16
Prinudna naplata sudske takse.....	16
NAPLATA TROŠKOVA PARNIČNOG I IZVRŠNOG POSTUPKA U 2024	18
PRAVNA MIŠLJENJA.....	19
STAMBENI PREDMETI.....	20
PREDMETI U PRIPREMI.....	20
IZVJEŠTAJ O JAVNIM NABAVKAMA.....	21
SISTEMATIZACIJA RADNIH MJESTA.....	25
OCJENA STANJA I POSTIGNUTI REZULTATI.....	27
SARADNJA PRAVOBRANILAŠTVA SA ORGANIMA KOJE ZASTUPA.....	27
PROGRAMSKA ORJENTACIJA ZA NAREDNI PERIOD.....	28

Shodno članu 37. Zakona o pravobranilaštvu ("Službene novine Kantona Sarajevo", broj 33/08, 7/12, 44/16 i 45/21), Pravobranilaštvo Kantona Sarajevo podnosi Skupštini i Vladi Kantona Sarajevo:

IZVJEŠTAJ O RADU PRAVOBRANILAŠTVA KANTONA SARAJEVO

za period od 01.01.2024. do 31.12.2024.godine

UVOD

Shodno Zakonu o Pravobranilaštvu ("Sl. Novine Kantona Sarajevo" br. 33/08, 7/12, 44/16 i 45/21), Pravobranilaštvo Kantona Sarajevo (u daljem tekstu: Pravobranilaštvo) je državno tijelo koje preduzima mjere i pravna sredstva radi pravne zaštite imovine i imovinskih interesa Kantona Sarajevo i njegovih organa, kantonalnih organa uprave, kantonalnih upravnih organizacija, stručnih službi i drugih institucija čiji je osnivač Kanton Sarajevo kao i da preduzima mjere i pravna sredstva radi pravne zaštite imovine i imovinskih interesa Općine Ilijaš.

Sjedište Pravobranilaštva Kantona Sarajevo je u Sarajevu, na adresi Branilaca Sarajeva 21/1.

Pravobranilaštvom Kantona Sarajevo rukovodi pravobranilac.

NADLEŽNOSTI PRAVOBRANILAŠTVA

ZASTUPANJE

Pravobranilaštvo preduzima pravne radnje, radi zaštite imovine i imovinskih interesa Kantona, pred sudovima i drugim nadležnim organima, kao i u drugim slučajevima zaštite imovine i imovinskih interesa Kantona, kada je na to ovlašteno zakonom.

U preduzimanju navedenih pravnih radnji, kao i u drugim slučajevima kada je na to ovlašteno zakonom, Pravobranilaštvo ima položaj i prava stranke u postupku, te je ovlašteno da preduzima sve radnje koje preduzima stranka u postupku.

Pravobranilaštvo vrši poslove pravne zaštite imovine i imovinskih interesa Kantona i njegovih organa, kantonalnih organa uprave, kantonalnih upravnih organizacija i stručnih službi i drugih institucija čiji je osnivač Kanton.

Izuzetno, Pravobranilaštvo vrši poslove pravne zaštite imovine i imovinskih interesa javnih preduzeća, javnih ustanova i drugih pravnih lica čiji je osnivač, odnosno suosnivač Kanton, a po zahtjevu osnivača, odnosno suosnivača.

Ako Vlada Kantona drugačije ne odluči, Pravobranilaštvo, pored vršenja poslova određenih zakonom, zastupa Kanton u postupcima pravne zaštite imovine i imovinskih interesa Kantona pred stranim sudovima, arbitražama i drugim stranim državnim organima i organizacijama.

Također, Pravobranilaštvo Kantona Sarajevo može zastupati navedene organe koji su tuženi u upravnom sporu, ako ga isti na to ovlaste.

STRUČNA POMOĆ I DAVANJE MIŠLJENJA

Pravobranilaštvo pruža stručnu pomoć organima, fondovima, preduzećima i drugim pravnim licima čiji je osnivač Kanton u rješavanju imovinsko-pravnih pitanja i daje mišljenje u vezi sa zaključivanjem ugovora imovinsko-pravne prirode.

Navedeni organi i pravna lica dužni su pribaviti pravno mišljenje Pravobranilaštva prije zaključenja ugovora o kupoprodaji, zamjeni, zakupu, prenosu na privremeno ili trajno korištenje stvari uz naknadu ili bez naknade, ugovora o koncesiji, ugovora o građenju i udruživanju sredstava za građenje, ugovora o statusnim i ugovornim oblicima povezivanja preduzeća, kao i drugih ugovora kojima se pribavljaju stvari ili raspolaže stvarima, odnosno materijalnim pravima, te ukoliko je predmet pravnog posla pokretna stvar ili imovinsko pravo čija vrijednost prelazi 10.000 KM na dan utvrđivanja vrijednosti.

Pored toga, Pravobranilaštvo daje Skupštini Kantona i organima Kantona, na njihov zahtjev, pravno mišljenje o imovinsko-pravnim ugovorima koje namjeravaju da zaključe sa stranim pravnim i fizičkim licima, kao i o drugim imovinsko-pravnim odnosima sa tim licima.

U postupku donošenja općih akata, kojima se uređuju imovinsko-pravni odnosi, prava i obaveze prema stvarima i vlasništvu Kantona, obavezno se pribavlja mišljenje pravobranioca.

Pravobranilaštvo Kantona Sarajevo je na osnovu člana 30. stav 2. Zakona o sudskim taksama Kantona Sarajevo ("Sl. novine Kantona Sarajevo", br. 36/2014 i 23/2016) ovlašteno za prinudnu naplatu neplaćene sudske takse, te na osnovu dostavljenog rješenja suda i obavještenja o neplaćenju taksi pokreće pred nadležnim sudom izvršni postupak.

Visina taksi se kreće od minimalnih iznosa od 10,00 KM pa do 10.000,00 KM i više. Riječ je o velikom broju predmeta koje ovo Pravobranilaštvo svakodnevno zaprima od Općinskog suda u Sarajevu. Složenost istih se posebno ogleda u tome da su nerjetko takseni obveznici strani ili državljani BiH sa prebivalištem u inostranstvu, što iziskuje znatno više vremena na pronalaženju i identifikaciji istih, zatim utvrđivanju osnova njihovih primanja a sve u cilju naplate sudske takse. Također važno je spomenuti i nemogućnost naplate taksi od onih pravnih lica koja su u međuvremenu likvidirana ili nad kojima je pokrenut stečajni postupak, kao i fizičkih lica koja ne ostvaruju prijavljene prihode. Kako je u pitanju značajna novčana suma koju ovo Pravobranilaštvo naplati u budžet Kantona, osnovano smo zatražili od Ministarstva finansija da se za ove uplate otvori posebna budžetska organizacija u cilju vođenja jasne evidencije o uplatama.

ZAKONSKI OSNOV

Pravobranilaštvo postupa u skladu sa utvrđenim nadležnostima propisanim Zakonom o pravobranilaštvu i drugim propisima, na temelju državnih, federalnih i kantonalnih zakona, kao i podzakonskih akata.

Osim nadležnosti i djelokruga rada Pravobranilaštva iz ovog Zakona, nadležnost Pravobranilaštva je predviđena i drugim propisima: Zakonom o građevinskom zemljištu ("Sl. novine FBiH", br. 25/2003, 16/2004 - ispr., 67/2005 i 94/2018 - odluka US), Zakonom o eksproprijaciji ("Sl. novine FBiH", br. 70/2007, 36/2010, 25/2012, 8/2015 - odluka US i 34/2016), Zakonom o sudskim taksama Kantona Sarajevo ("Sl. novine Kantona Sarajevo", br. 36/2014 i 23/2016), Zakonom o stvarnim pravima ("Sl. novine FBiH", br. 66/2013, 100/2013 i 32/2019 - odluka US) te drugim propisima.

POSTUPCI PRED SUDOVIMA I POSLOVI ZASTUPANJA

U okviru aktivnosti na poslovima zastupanja, Pravobranilaštvo je bilo angažovano na slijedećim poslovima:

- sačinjavanju tužbi i upućivanje istih nadležnim sudovima,
- izradi odgovora na tužbe zaprimljene protiv Kantona,
- zastupanje na ročištima,
- izrada pismenih podnesaka u toku trajanja postupka,
- ulaganju redovnih i vanrednih pravnih lijekova protiv odluka sudova,
- podnošenje apelacija pred Ustavnim sudom BiH,
- uključivanje u svojstvu umješaka u sudske sporove na strani jedne parnične stranke,
- davanju pismenog odgovora na pravne lijekove druge stranke u postupku,
- zaključivanje sudskih nagodbi, kao i pokušaj rješavanja sporova putem medijacije,
- sačinjavanju opomena pred tužbu i drugi administrativno-tehnički poslovi.

U 2024. godini u radu Pravobranilaštva evidentirano je ukupno 13.744 predmeta, od kojih je 1.317 parničnih predmeta (P), 4.537 izvršnih predmeta (I), 6.654 predmeta izvršnog postupka za sudsku taksu (It), 200 upravnih predmeta (U), 344 mišljenje (M), 69 vanparničnih predmeta (Rv), 23 upravnih sporova (Us), 10 mišljenja u vezi nadležnosti Pravobranilaštva shodno čl. 16. Zakona o građevinskom zemljištu i čl. 363. Zakona o stvarnim pravima (Um), 377 internih spisa (Pk), 11 stambenih predmeta (Su) i 202 predmeta - priprema za parnicu (Pr).

Prema vrsti predmeta, tj. predmetu spora i postupaka shodno odredbama Pravilnika o poslovanju i vođenju evidencije u Pravobranilaštvu Kantona Sarajevo ("Sl. novine Kantona Sarajevo", broj 17/08) u kojima se Pravobranilaštvo pojavljuje kao zakonski zastupnik organa koje zastupa za period od 01.01.2024.–31.12.2024.godine, tabelarni pregled izgleda kako slijedi:



Vrsta Predmeta	Prenešeno iz ranijih godina	Primljeno u 2024.g	Ukupno u radu 2024.g	Riješeno u 2024.g	U radu sud-a ili organ-a uprave	Postotak rješenosti
"P" (parnični)	1.152	165	1.317	271	1.046	20,57 %
"I" (izvršni)	4.323	214	4.537	411	4.126	9,05 %
"It" (izvršni postupak za sudsku taksu)	3.259	3.395	6.654	2.432	4.222	36,54%

“Rv” (vanparnični)	37	32	69	13	56	18,84 %
“M” (mišljenja)	52	292	344	255	89	74,12 %
“Pr” (priprema)	163	39	202	21	181	10,39 %
“Us” (upravni spor)	21	2	23	3	20	13,04 %
“U” (upravni postupak)	96	104	200	41	159	20,50 %
“Um” (mišlj. čl.16.ZOGZ)	10	0	10	3	7	30,00 %
“Pk” (interni spisi)	0	377	377	340	37	90,18 %
“Su” (stambeni)	0	11	11	5	6	45,45%
UKUPNO	9.113	4.631	13.744	3.795	9.949	27,61%

Napomene radi, ukupan postotak riješenosti predmeta u 2024. godini, kao što proizilazi iz prikazane tabele zavisi isključivo od efikasnosti u postupanju Sud-a odnosno organa Uprave koji vodi svaki poseban predmet.

PODACI O KRETANJU PREDMETA

Pravobranilaštvo je tokom izvještajne godine imalo visok broj ulazne i izlazne pošte. Tabelarni pregled iste, omogućava nam određeni uvid u kretanje spisa po mjesecima u izvještajnom periodu, odnosno obimu poslova i zadataka koje je ovo Pravobranilaštvo obnašalo u protekloj godini, posebno ističući da Pravobranilaštvo ima određen broj sistematizovanih, a nepopunjenih radnih mjesta kao i da je jedna stručna saradnica na porodijskom bolovanju.



PARNIČNI POSTUPAK "P"


Parnični postupci su najsloženiji sudski postupci u kojem se rješavaju sporni odnosi, u kojima se od stranaka koje učestvuju u postupku zahtijeva visok stepen znanja i angažovanja. Parnični postupak predstavlja redovan put zaštite povreda prava proisteklih iz radno pravnih odnosa, građansko pravnih odnosa subjekata prava, kao i odnosa sa javnom vlasti. Parnični postupci se pokreću tužbom. Parnične stranke u postupku su tužitelj i tuženi, te se u parnici kao treće lice ukoliko imaju pravni interes mogu pojaviti i umješaci kada isti učestvuju na strani jedne parnične stranke i žele da parnična stranka uspije u sporu. Kanton Sarajevo koji zastupa Pravobranilaštvo u sudskim postupcima učestvuje u svojstvu tužitelja, svojstvu tuženog ili u svojstvu umješaca.

Kao i u predhodnim godinama tako i u 2024. godini Pravobranilaštvo Kantona Sarajevo se pojavljuje na strani tužitelja ili tužene u svojstvu umješaca, a sve u cilju uspjeha stranke u postupku na čijoj strani se miješa Pravobranilaštvo.

Kao što smo i u ranijim izvještajima ukazivali na probleme - parnice koje se odnose na vodozaštitnu zonu na području Općine Ilijaš, isti trend je nastavljen i u 2024. godini. Podsjećanja radi, radi se o predmetima u parnicama za određivanje visine naknade za zemljišta u vodozaštitnim zonama, u kojima se ovo pravobranilaštvo uključuje kao umješac na strani tuženog KJKP Vodovod i kanalizacija kojih postupaka ima više od deset trenutno i čije vrijednosti se kreću od 500.000,00 KM pa nadalje po jednom predmetu u zavisnosti od broja tužitelja i veličine njihovih suvlasničkih dijelova.


U ovom izvještajnom periodu bilo je ukupno u radu 1.317 parničnih predmeta, od kojih je 1.152 predmeta kao nezavršenih preneseno iz prethodnih godina. U 2024. godini je evidentirano 165 novih predmeta, a 271 predmeta je riješeno. Nesrazmjer između prenesenih predmeta iz ranijih godina i novozaprimljenih predmeta jeste posljedica dugotrajnog vođenja postupaka pred sudovima. Pod predmetima koji su preneseni iz ranijeg perioda između ostalih su i predmeti koji su po uvaženim žalbama Pravobranilaštva ukinuti pred drugostepenim sudom i vraćeni na ponovni postupak.

Grafički prikaz "P" predmeta u 2023. godini




U 2024. godini pravosnažno je okončano 271 parnica i to: 67 sa pozitivnim ishodom, 149 parnicasa negativnim ishodom i 55 parnica okončane su na drugi način. Razlozi negativnih ishoda parnica iz radnih odnosa su identični za sve vrste potraživanja razlika plaća u prethodnom periodu. Neusklađenost propisa, tačnije smanjenja plaća suprotno imperativnim zakonskim propisima, dovela su do negativnih posljedica u vidu gubljenja parnica. Važno je istaći da su gubici uvećani za troškove sudskog postupka, nalaze vještaka u postupcima i zakonske zatezne kamate. Na naprijed navedene posljedice i negativne ishode po budžet Kantona Sarajevo, Pravobranilaštvo je ukazivalo više puta.

Postotak riješenosti (%)



271 okončane parnice



Po vrsti i predmetu spora, najveći broj postupaka odnosi se na predmete po osnovu:

- radni sporovi, posebni dodatak na plaću i druga potraživanja iz radno-pravnog odnosa
- sporovi obligaciono-pravne prirode radi duga iz obligacionih odnosa, po osnovu koncesija, kredita i dr
- naknada šteta- materijalne i nematerijalne zbog povreda nanesenih ujedom pasa i drugih razloga, oštećenje imovine usljed neodržavanja saobraćajnica kao i drugi vidovi odštetnih zahtjeva
- utvrđenja imovinsko-pravnih odnosa (prava vlasništva, utvrđivanje obaveza nastalih usljed nerješениh imovinsko-pravnih odnosa i sl.

ZNAČAJNIJE PARNICE U 2024. GODINI

Značajnije parnice iz oblasti radno-pravnih sporova

Smatramo da je određene radne sporove navedne u okviru ovog odjeljaka izvještaja značajno spomenuti iako vrijednost spora u novčanom smislu nije značajna. Naime, priroda određenih sporova – utvrđivanje diskriminacije koja je navodno počinjena od strane Vlade KS i predstavnika sudskih i organa uprave, te moguće posljedice u socijalnom smislu u slučaju donošenja presuda kojim bi se tužbeni zahtjevi usvojili tj. sud utvrdio da je došlo do diskriminacije, kako to tužitelji tvrde, daje poseban značaj ovim predmetima. Ono po čemu se navedeni predmeti također ističu je izuzetna obimnost predmeta, konkretno dokaznog materijala, koja iziskuje značajno vrijeme koje je utrošeno za pregled i analizu istih.

Nove tužbe namještenika uposlenih u upravnim organima i uposlenika pravosuđnih institucija (namještenici, sudije i tužioci) u Kantonu Sarajevo su obilježile 2024. godinu. Kada su u pitanju predmetne tužbe navedenih uposlenika, tužbeni zahtjevi se temelje pretežno na dva osnova. Prvi osnov je potraživanje razlike plaće namještenika po osnovu posebnih uslova rada. Drugi osnov se odnosi na razliku plaća nastalih usljed pripravnosti na radu, koja je propisana Kolektivnim Ugovorom za službenike organa uprave i sudske vlasti.

Tužbeni zahtjevi tužilaca odnose se na razliku plaća ostvarenih na osnovu prekovremenih sati na ime dežura. Naime, tužioci pored redovnog radnog vremena obavljaju i obavezne 24 satne dežure zbog čega smatraju tužbene zahtjeve osnovanim.

Značajniji predmeti iz oblasti radno pravnih odnosa predstavljeni su u tabeli koja slijedi.

Red. br.	Broj pred.	TUŽITELJ	TUŽENI	TUŽBENI ZAHTEJEV	VRIJEDNOST SPORA	FAZA POSTUPKA
1.	P-116/22	Bahtanović Almedin	1. Kanton Sarajevo, Ministarstvo unutrašnjih poslova, Uprava policije 2. Kanton Sarajevo, Policijski odbor	Utvrđenje nezakonitosti rješenja i njihovo poništenje, te utvrđenje diskriminacije (mobing)	4.500,00 KM	Prvostepenom presudom odbijen tužbeni zahtjev
2.	P-30/21	Omerspahić Emin	Kanton Sarajevo, Uprava za inspekcijske poslove KS	Razliku neisplaćenih plaća i doprinosa kao naknadu štete na ime mobinga i diskriminacije	40.000,00 KM	Nepravomoćno odbijen tužbeni zahtjev
3.	P-7/19	Peljto Samir	1. Kanton Sarajevo, Ministarstvo finansija 2. Halebić Jasmin	Utvrđivanje diskriminacije i mobinga	30.000,00 KM	Nepravomoćno odbijen tužbeni zahtjev
4.	P-106/21	IN d.o.o. Sarajevo	Kanton Sarajevo	Utvrđenje diskriminacije u postupanju sudija Općinskog suda u Sarajevu	100.000,00 KM	Revizija tužitelja odbijena (tužbeni zahtjev u cijelosti odbijen)
5.	P-336/23	Begović Omer	1. Kanton Sarajevo, Vlada KS, Ministarstvo za odgoj i obrazovanje 2. JU O.Š. "Aneks"	Poništenje odluke za davanje saglasnosti za imenovanje direktora	5.000,00 KM	Prvostepenom presudom odbijen tužbeni zahtjev
6.	P-126/19	Nataša Zlomislić	Kanton Sarajevo, Općinski sud u Sarajevu	Utvrđivanje diskriminacije i naknade štete	15.000,00 KM	Tužbeni zahtjev odbijen u cijelosti. U toku žalbeni postupak
7.	P-9/22	Općina Vogošća	Kanton Sarajevo	Isplata po pravomoćnim presudama	41.527,59 KM	Prvostepenom presudom odbijen

						tužbeni zahtjev
8.	P - 12/21	Amna Mutapčić	1. Kanton Sarajevo, Ministarstvo pravde i uprave 2. Federacija BiH	Utvrđivanje i otklanjanje diskriminacije	5.100,00 KM	Pravomoćno odbijen tužbeni zahtjev, izjavljena revizija
9.	P - 8/24	Mezildžić Nejra i dr.	Kanton Sarajevo	Potraživanje iz radnog odnosa	36.000,00	Prvostepenom presudom odbijen tužbeni zahtjev u cijelosti
10.	P- 59/24	Kanton Sarajevo	Samostalnisindikat osnovnog obrazovanja i odgoja FBiH	Radi zabrane organizovanja i provođenja štrajka	-	Pravomoćnom presudom usvojen tužbeni zahtjev u cijelosti

U ovom dijelu posebno je vrijedno istaći predmet u kojem je Kanton Sarajevo, zastupan po Pravobranilštvu Kantona Sarajevo podnio tužbu protiv Samostalnog sindikata osnovnog obrazovanja i odgoja Federacije Bosne i Hercegovine radi zabrane organizovanja i provođenja štrajka započetog 17.04.2024. godine iz razloga što isti nije najavljen, organizovan i vođen u skladu sa Zakonom o štrajku ("Službene novine FBiH", broj: 14/00).

Prvostepeni sud je smatrao da štrajk koji je proveden u periodu 17.04.2024. godine do 19.04.2024. godine nije štrajk upozorenja već štrajk prije čijeg organizovanja i provođenja je potrebno kumulativno ispuniti formalne uslove kao što je obaveza obavješćavanja Ministarstva unutrašnjih poslova, predhodno okončanje postupka mirenja i dr. te kako isti nisu bili ispunjeni prvostepeni sud je ocijenio da obustava rada koja je nastupila od 17.04.2024. godine do 19.04.2024 godine nije zakonita.

Prvostepenom presudom je utvrđeno da je štrajk kojeg je tuženi organizovao i proveo po Odluci broj 715/24 od 16.04.2024. godine u svim ustanovama osnovnog odgoja i obrazovanja na području Kantona Sarajevoi nezakonit te je obavezao tuženog da tužitelju nadoknadi troškove postupka u iznosu od 480,00 KM.

Nakon što je tuženi podnio žalbu na prvostepenu odluku posebno istrajavajući u osporavanju pravnog interesa tužitelja za utvrđivanje nezakonitosti štrajka Kantonalni sud u Sarajevu dana 16.10.2024. godine odbija žalbu kao neosnovanu i potvrđuje prvostepenu presudu.

Uspjeh u ovom postupku smatramo naročito važnim i radi same pouke sindikatima, odnosno njihovim predstavnicima potpisnicima kolektivnih ugovora sa Vladom Kantona da svako organizovanje i započinjanje štrajka koje nije u skladu sa pozitivnim propisima biće sudskim putem zabranjeno.

Značajnije parnice iz oblasti obligaciono-pravnih sporova – naknada štete

Kao i svake godine i u 2024.godini, Pravobranilaštvo je od organa uprave zaprimilo zahtjeve sa pratećom dokumentacijom za pokretanje parničnih postupaka za naknadu štete nastale po različitim osnovama. S druge strane zaprimali smo tužbe u kojima je Kanton tužen po istom osnovu. U tabeli ispod predstavljene su najznačajnije parnice po osnovu naknade štete koje su zaprimljene, u toku su ili su pak okončane u predstojećoj godini.

Re d. br.	Broj pred.	TUŽITELJ	TUŽENI	TUŽBENI ZAHTJEV	VRIJEDNOST SPORA	FAZA POSTUPKA
1.	P-143/18	Centrotrans-Eurolines dd Sarajevo	Kanton Sarajevo	Tužba radi isplate duga	1.447.067,94	Glavna rasprava u toku
2.	P-609/15	Šehmujović Alvin	1.Kanton Sarajevo 2.KJKP ViK d.o.o. Sarajevo	Tužba radi isplate potraživanja	21.000,00 KM	U toku žalbeni postupak
3.	P-43/21	"Mujanići" d.o.o. Vogošća	Kanton Sarajevo-Kantonalna uprava za inspeksijske poslove	Naknada štete	46.692,31 KM	Pravomoćno m odlukom odbijen tužbeni zahtjev u cijelosti
4.	P-143/24	METROMEDIA d.o.o. Sarajevo	Kanton Sarajevo, Min. saobraćaja	Naknada izgubljene dobiti	1.122.232,00 KM	Pripremno ročište
5.	P-58/22	Kanton Sarajevo, Ministarstvo unutrašnjih poslova	"Danial S" d.o.o. Tešanj	Radi raskida ugovora i povrata uplaćenih sredstava	861.301,35 KM	Zaključena glavna rasprava
6.	P-40/23	Zdravstvena ustanova ATRIUM Sarajevo i dr.	1. Kanton Sarajevo 2. ZZO Kantona Sarajevo	Naknada izgubljene dobiti	6.790.000,00 KM	Čeka se termin za glavnu raspravu
7.	P-144/24	Dupovac Hasan	Kanton Sarajevo, MUP	Naknada štete	80.000,00 KM	Čeka se presuda
8.	P-169/23	Aljović Mejra	Kanton Sarajevo, Općinski sud u Sarajevu	Naknada štete	1.033.000,00 KM	Pravomoćno odbijen t. zahtjev u cijelosti
9.	P-4/20	Farmacop d.o.o.	1. Direkcija za robne rezerve	Naknada štete zbog	65.431,00KM	Prvostepeno m presudom

			KS 2. Kanton Sarajevo	neispunjenja ugovora		tužbeni zahtjev odbija (STEČAJ)
10.	P- 127/19	1. FE AL METALI d.o.o. 2. Hajrudin Mulić	1. Kantonalna agencija za privlačenje stranih investicija 2. Kanton Sarajevo	Naknada štete radi nemogućnos ti ulaska u posjed privatizovani h nekretnina	8.745.415,00	U toku žalbeni postupak
11.	P - 144/24	Krajinović Zlatko,	Kanton Sarajevo, Min. saobraćaja	Utvrdjivanje ništavosti zaključenih ugovora o iznajmljivanju parking prostora	30.000,00 KM	Pripremno ročište
12.	P- 275/23	Milutinović Miroslav	1. BiH, Ministarstvo vanjskih poslova 2. FBiH, Vlada FBiH, Služba za zajedničke poslove 3. Kanton Sarajevo, ministarstvo Komunalne privrede, infrastrukture, pr. Uređenja i zašt. okoliša	Naknada štete	100.000,00 KM KM	Glavna rasprava u toku
13.	P-9/22	Općina Vogošća	Kanton Sarajevo	Isplata po pravomoćni m presudama	41.527,59 KM	U toku žalbeni postupak
14.	P- 27/17	1. Kanton Sarajevo, Stručna služba za zajedničke poslove	"UNIQA" osiguranje	Naknada štete	418.214,09 KM	Pravomoćno m presudom usvojen tužbeni zahtjev

Predmeti u kojim Kanton Sarajevo potražuje isplatu duga na ime koncesione naknade za eksploataciju

Pravobranilaštvo Kantona Sarajevo pred Općinskim i Kantonalnim sudom u Sarajevu vodi parnice u vezi sa potraživanjima na ime eksploatacije građevinskog kamena i eksploatacije vode.

U većini predmeta ove vrste pravni osnov za utuženje je bila Odluka o naknadi za eksploataciju vode na području Kantona Sarajevo (Sl.novine Kantona broj 29/12), koja je početkom 2018. godine stavljena van snage. Riječ je, dakle, o koncesionarima sa kojima Koncesor nije imao zaključen ugovor.

Podsjećanja radi, prema definiciji koncesija predstavlja davanje prava na korištenje prirodnih bogatstava, dobara u općoj upotrebi ili obavljanje djelatnosti od općeg interesa, koje nadležni kantonalni organi (koncesor) dodjeljuje na određeno vrijeme, uz plaćanje koncesione naknade, domaćem ili stranom pravnom ili fizičkom licu registrovanom za obavljanje privredne djelatnosti (koncesionar), pod uslovima propisanim Zakonom.

Red. br.	Broj pred.	TUŽITELJ	TUŽENI	TUŽBENI ZAHTEJ	VRIJEDNOST SPORA	FAZA POSTUPKA
1.	1. P-522/16	Kanton Sarajevo	"Hoteli Ilidža" d.d. Ilidža	Naknada za eksploatisanu vodu	626.630,59 KM	Izvršena naplata, tuženi podnio apelaciju
2.	1. P-70/18	Kanton Sarajevo	"Hoteli Ilidža" d.d. Ilidža	Naknada za eksploatisanu vodu	411.892,78 KM	U toku je postupak prinudne naplate
3.	P – 672/15	Kanton Sarajevo	Srednjobosanski kanton	Naknada za eksploataciju dolomita	411.039,00 KM	U toku je postupak prinudne naplate
4.	P-263/23	Kanton Sarajevo	"Sarajevo international" d.o.o. Sarajevo	Isplata duga po osnovu Ugovora o koncesiji	449.378,37 KM	Prekid postupka radi rješavanja predhodnog pravnog pitanja
5.	P-264/23	Kanton Sarajevo	"Sarajevo international" d.o.o. Sarajevo	Naknada po osnovu Ugovora o koncesiji	538.364,97 KM	Prekid postupka radi rješavanja predhodnog pravnog pitanja
6.	P-80/18	Kanton Sarajevo	Željezara Ilijaš d.d. Ilijaš	Naknada za eksploatisanu	589.050,00 KM	U toku je postupak

				vodu		prinudne naplate
7.	P-488/16	Kanton Sarajevo, Ministarstvo privrede	"Bags energotehnika" d.d.	Dug po osnovu eksploatacije vode	12.298.963,50 KM	U toku je izvršni postupak

Značajniji postupci iz oblasti imovinsko-pravnih odnosa

Među najznačajnijim postupcima iz ove oblasti smatramo da su utvrđivanja prava vlasništva, bilo da se Kanton Sarajevo nalazi na strani tužitelja ili na suprotnoj strani.

Riječ je dakle o postupcima u kojima se zasigurno provodi najveći broj dokaza, postupci koji imaju gotovo uvijek velike vrijednosti pa im se iz tih razloga posvećuje najviše vremena, energije i znanja. U slijedećoj tabeli prikazani su najznačajniji postupci iz ove oblasti.

Red br.	Broj pred.	TUŽITELJ	TUŽENI	TUŽBENI ZAHTEJEV	VRIJEDNOST SPORA	FAZA POSTUPKA
1.	P-662/16	Kanton Sarajevo	Poljooprema d.d. Sarajevo i dr.	Utvrđenje ništavosti ugovora o prodaji nekretnina	2.500.000,00 KM	Ponovni postupak
2.	P-74/20	Higijena d.o.o. Sarajevo	1.Kanton Sarajevo 2.Zavod za izgradnju KS	Naknada na ime faktičke eksproprijacije	400.000,00 KM	U toku žalbeni postupak
3.	P-103/23	1.Kanton Sarajevo, 2.Univerzitet u Sarajevu	Zavod za saobraćaj Građevinskog fakulteta Sarajevo-u stečaju	Osnovanost izlučne prijave u stečaju	1.000,00 KM	Prekid postupka radi rješavanja predhodnog pravnog pitanja
4.	P-14/21	Općina Hadžići	KJP Sarajevo-šume d.o.o. Umješač: Kanton Sarajevo	Utvrđenje prava vlasništva	50.100,00 KM	Donesena pravomoćna odluka kojom je tužbeni zahtjev odbijen.
5.	P-135/22	Radojević Nadežda	KJKP Vodovod i kanalizacija d.o.o. Kanton Sarajevo	Utvrđivanje tržišne vrijednosti parcela	233.440,00	Djelomično usvojen t. zahtjev

			umješač na strani tuženog	tužitelja i isplata tržišne vrijednosti za iste		
--	--	--	------------------------------	--	--	--

U ovom dijelu, iako nije bilo predmet sudskih postupaka, vrijedno istaći postupanje Pravobranilaštva Kantona Sarajevo u predmetu po Zahtjevu Ministarstva Privrede Kantona Sarajevo, a odnosi se na rješavanje prenosa prava vlasništva na nekretninama između "FAMOS d.d. Sarajevo kao prenosioca i Kantona Sarajevo kao sticaoca. Višegodišnji naponi posebno intenzivirani u izvještajnoj godini rezultirali su upisom prava vlasništva na nekretninama (Hotel Maršal) u korist Kantona Sarajevo.

Takođe, značajan je angažman ovog Pravobranilaštva po zahtjevu JU O.Š. "Malta" u rješavanju imovinsko-pravnih odnosa na nekretninama koje su u posjedu i koje koristi škola, a koje je bilo preduslov za planiranu nadogradnju školskog objekta. Radilo se o izuzetno složenim problemima koji su predhodili upisu prava vlasništva nekretnina u korist Kantona Sarajevo, a koji su se ogledali u iscjepkanosti nekretnine na više kakastarskih čestica sa većim brojem upisanih trećih lica kao titulara prava vlasništva. S obzirom da je u toku izgradnje škole predhodno proveden postupak eksproprijacije, bilo je neophodno pronaći dokaze o isplaćenim naknadama za ekspropisano zemljište što je uz naporan rad u saradnji sa Zavodom za izgradnju Kantona Sarajevo postignuto, da bi se u konačnici Kanton Sarajevo upisao sa pravom vlasništva 1/1 na predmetnim nekretninama nakon čega se pristupilo uplanjenju objekta Osnovne škole "Malta".

Ovdje treba napomenuti i postupanje Pravobranilaštva Kantona Sarajevo u vezi sa rješavanjem pitanja sjedišta MUP-a Kantona Sarajevo. Rješavanje imovinsko-pravnih pitanja u vezi sa prenosom prava vlasništva na nekretninama sa KJKP "Vodovod i kanalizacija" kao prenosioca na Kanton Sarajevo kao sticaoca rezultiralo je upisom prava vlasništva u zemljišne knjige i stvaranja svih preduslova za preduzimanje daljih radnji radi realizacije projekta izgradnje sjedišta MUP-a Kantona Sarajevo.

VANPARNIČNI POSTUPAK

U 2024 godini ukupno u radu ovog Pravobranilaštva bila su 33 vanparnična predmeta. Dosadašnja praksa suda je bila da u vanparničnim postupcima Direkcija za puteve se zastupa samostalno. Promjenjenom odlukom Kantonalnog suda, dostavljeni su svi spisi ovom organu kao zakonskom zastupniku za zastupanje u postupcima određivanja naknade tržišne vrijednosti zemljišta koje se ekspropriše. Dakle, u postupcima određivanja naknada cijena nekretnina koje se eksproprišu za potrebe izgradnje javnih cesta ovaj organ zastupa i svojim znanjem i iskustvom pokušava osporiti tržišne cijene koje vještaci u postupcima određuju u visočijim iznosima od procjena koje su nastale u upravnim postupcima. Praksa je postala da raniji korisnici zauzetih nekretnina podnose prijedloge za sudsko odlučivanje nezadovoljni ponuđenim iznosom i na taj način pokušavaju uz pomoć vještačenja postići maksimalan iznos cijene svojih nekretnina.

IZVRŠNI POSTUPAK

U 2024. godini u radu je evidentirano 4.323 izvršnih predmeta, od kojih je u 2024. godini zaprimljeno 214, a preneseno je iz ranijih godina 4.537 predmeta. Od ukupnog broja predmeta u 2023. godini okončano je 378, a u radu je ostalo 4.430 predmeta, sve kao u sljedećem tabelarnom pregledu.

Vrsta Predmeta	Prenešeno iz ranijih godina	Primljeno u 2024.g.	Ukupno u radu 2024.g.	Riješeno u 2024.g.	U radu sud organ uprave	Postotak riješenosti
"I" (izvršni)	4.323	214	4.537	411	4.126	9,05 %

U izvršnim postupcima Kanton Sarajevo se pojavljuje kao izvršenik ili kao tražilac izvršenja. U izvršnim postupcima u kojima se Kanton Sarajevo pojavljuje kao izvršenik, tražioci izvršenja su tužitelji u predmetima u kojima je pravomoćnim presudama obavezan Kanton Sarajevo na isplatu određenog novčanog iznosa (u većini slučajeva radi se o predmetima iz radnih odnosa) i kojima se na osnovu pravomoćnih i izvršnih presuda predlaže prinudna naplata.

Pravobranilaštvo je u svim predmetima u kojima je donesena pravomoćna i izvršna presuda u korist Kantona Sarajevo i kojima su tuženi obavezani da Kantonu Sarajevo isplate određene novčane iznose, pokrenulo izvršne postupke radi prinudnog namirenja.

Dalje ističemo da je Pravobranilaštvo Kantona Sarajevo, na osnovu Presuda Općinskog suda u Sarajevu i nakon pravomoćnosti i izvršenosti, putem postupaka prinudne naplate potraživanja naplatilo u budžet Kantona Sarajevo sljedeće iznose:

- Teloptic d.o.o. Sarajevo sa kamatom i troškovima postupka **naplaćeno 940.601,00 KM**
- HBRD Hoteli Ilidža sa kamatom i troškovima postupka **naplaćeno 802.964,00 KM**
- Teloptic d.o.o. Sarajevo sa kamatom i troškovima postupka **naplaćeno 93.492,00 KM**
- Samars d.o.o. Sarajevo sa kamatom i troškovima postupka **naplaćeno 83.369,04 KM**

Takođe, u izvještajnoj godini zaključen je sporazum o dobrovoljnom izmirenju duga, u ukupnom iznosu od 589.050,00 KM, sa zakonskom zateznom kamatom i troškovima postupka, kojim se izvršenik, "Željezara" Ilijaš d.d., obavezao na plaćanje duga u mjesečnim ratama u ukupnom iznosu od 17.471,62 KM počevši od 01.03.2024. godine, te je do kraja 2024. godine **naplaćen ukupan iznos od 174.716,20 KM.**

IZVRŠNI POSTUPAK ZA NAPLATU SUDSKE TAKSE

PRINUDNA NAPLATA SUDSKE TAKSE

Pravobranilaštvo Kantona Sarajevo je na osnovu člana 30. stav 2. Zakona o sudskim taksama Kantona Sarajevo ("Sl. novine Kantona Sarajevo", br. 36/2014 i 23/2016) ovlašteno za prinudnu naplatu neplaćene sudske takse, te na osnovu dostavljenog rješenja suda i obavještenja o neplaćenju taksi pokreće pred nadležnim sudom izvršni postupak.


Visina taksi se kreće od minimalnih iznosa od 10,00 KM pa do 10.000,00 KM i više. Riječ je o velikom broju predmeta koje svakodnevno zaprimamo od Općinskog suda u Sarajevu. Složenost istih se posebno ogleda u tome da su nerjetko takseni obveznici strani državljani što iziskuje

dodatno više vremena na pronalaženju i identifikaciji istih, zatim utvrđivanju osnova njihovih primanja, a sve u cilju naplate sudske takse. Također važno je spomenuti i nemogućnost naplate taksi od onih pravnih lica koja su u međuvremenu likvidirana ili nad kojima je pokrenut stečajni postupak, kao i fizičkih lica koja ne ostvaruju prijavljene prihode. Kako je u pitanju značajna novčana suma koju ovo Pravobranilaštvo naplati u budžet Kantona, osnovano smo zatražili od Ministarstva finansija da se za ove uplate otvori posebna budžetska organizacija u cilju vođenja jasne evidencije o uplatama.

Ukupno u radu za 2024. godinu bilo je 6.654 predmet, iz ranijih godina je preneseno 3.259, a zaprimljeno je 3.395 novih predmeta.

U slučaju pokretanja izvršnih postupaka kako u predhodnim tako i u izvještajnoj godini, Pravobranilaštvo nailazi na prepreke koje usložnjavaju i vremenski produžavaju postupanja po istim, a koje se ogledaju u tome da se u svakom predmetu radi identifikacija dužnika, stvara potreba vršenja uvida u sudske spise, zatim pribavljanja klauzule pravomoćnosti i izvršnosti, te posebno pribavljanje informacija o posjedovanju pokretne ili nepokretne imovine, odnosno podataka o primanjima dužnika.

Vrsta Predmeta	Preneseno iz ranijih godina	Primljeno u 2024.g.	Ukupno u radu 2024.g.	Riješeno u 2024.g.	U radu sud organ uprave	Postotak riješenosti
“I” (izvršni postupak za sudsku taksu)	3.259	3.395	6.654	2.432	4.222	36,54%



Iz navedene evidencije, vidljivo je da je vršena uplata predmetnih novčanih sredstava na račun Kantona Sarajevo, a vrijednost koja je uplaćena na ime sudske takse za 2024. godinu iznosi 840.595,04 KM do sada je najznačajnija i pokazuje tendenciju rasta prihoda po tom osnovu.


NAPLATA TROŠKOVA PARNIČNOG I IZVRŠNOG POSTUPKA U 2024.GODINI

Zahvaljujući olakšanoj komunikaciji sa Ministarstvom finansija KS u smislu da na mjesečnom nivou elektronskim putem zaprimamo podatke o naplaćenim troškovima postupaka olakšan je pregled i kontrola naplaćenih troškova pojedinačnih postupaka. Prema tim podacima naplaćeni sudski troškovi za 2024.godinu iznose 202.942,51 KM, što je u odnosu na prethodni period značajan napredak. S tim u vezi potrebno je ponovo ukazati na značaj izmjena ZPP-a kojim su navedni troškovi pripali Pravobranilaštvu kao zakonskom zastupniku Kantona Sarajevo koji na ovaj način naplaćuju sredstva u budžet Kantona.

Pored toga što se iznos iz godine u godinu povećava i predstavlja pozitivnu stavku u našem radu, dobra strana navednog je i u činjenici da se Pravobranilaštvo ne zatrpava neosnovanim tužbenim zahtjevima.

Ostvarujući ovako zapažene finasijske rezultate smatramo da posebna stavka „naplata troškova“ zavređuje pažnju, te je zbog navedenog razloga detaljno izvještajem o radu i opisujemo. Iznos na ime naknade troškova za jednu godinu u visini od 202.942,51 KM, pored sudskih taksi (naplaćeni iznos od 840.595,04 KM) nije zanemariv kada se uzme u obzir nadležnost i funkcija Pravobranilaštva, a to je prvenstveno zaštita imovinsko pravnih interesa u postupcima zastupanja pred sudom.

Sljedećim grafikonom prikazani su naplaćeni sudski troškovi.



PRAVNA MIŠLJENJA

Shodno članu 15. Stav 2. Zakona o pravobranilaštvu, organi i organizacije Kantona Sarajevo, čije interese zastupa ovo Pravobranilaštvo, dužni su pribaviti pravno mišljenje Pravobranilaštva, prije zaključenja ugovora o kupoprodaji, zamjeni, zakupu, prenosu na privremeno ili trajno korištenje i raspolaganje stvari uz naknadu ili bez naknade, ugovora o koncesiji, ugovora o građenju, kao i drugih ugovora kojima se pribavljaju stvari ili se raspolaze imovinom Kantona. Pravobranilaštvo u skladu sa Uredbom o postupku i načinu pripremanja, izrade i dostavljanja propisa daje mišljenja na nacrt zakona kojima se regulišu imovinsko – pravna pitanja.

U 2024. godini Pravobranilaštvo je dalo značajan broj pravnih mišljenja što je vidljivo iz tabelarnog prikaza, ali svakako napominjemo da se radi o poslovima koji iziskuju jako puno vremena i stručnosti i čija važnost nije manja od naprijed navedenih predmeta u kojima Pravobranilaštvo vrši zastupanje. Pravobranilaštvo cijeni da adekvatno i stručno dato prethodno mišljenje na dostavljeni prijedlog ugovora imovinsko-pravne prirode u značajnoj mjeri doprinosi zaštiti imovine i imovinskopravnih interesa Kantona Sarajevo, pa samim tim ishodu eventualne parnice.

U izvještajnom periodu, kao i u prethodnim godinama, bio je značajan broj predmeta u radu Pravobranilaštva, koji se odnose na davanje mišljenja na Sporazume koji zaključuju Kantona Sarajevo i njegovi organa sa drugim nivoima vlasti, te domaćim i međunarodnim pravnim licima, a u cilju relizacije projekata značajnih za Kanton Sarajevo kao i njegove građane.

Smatramo važnim istaći da je uloga Pravobranilaštva u pružanju pravne pomoći kao i davanju pravnog mišljenja od velikog značaja za Kanton bila na predmetu koji se tiče izgradnje MUP-ove zgrade na Pofalićima, na koji način se realizovao Zaključak Skupštine KS o rješavanju imovinsko pravnih odnosa radi izgradnje MUP-ove zgrade na navednom lokalitetu.

Tabelarni prikaz prikazuje broj datih mišljenja te postotak njihove riješenosti.

Vrsta Predmeta	Prenešeno iz ranijih godina	Primljeno u 2024.g.	Ukupno u radu 2024.g.	Riješeno u 2024.g.	U radu sud organ uprave	Postotak riješenosti
"M" (mišljenja)	52	292	344	255	89	74,12 %

STAMBENI PREDMETI

Kada je u pitanju segment djelovanja u vezi realizacije imovinskih zakona, ovaj organ je dao izuzetan doprinos u privatizaciji stambenog fonda, odnosno u realizaciji Zakona o prodaji stanova na kojima postoji stanarsko pravo tj. kroz postupanje u vezi ovlaštenja Pravobranilaštva koja su proizilazila iz člana 29. citiranog Zakona, a odnose se na kontrolu utvrđenja cijene stana u ugovoru.

Naprijed smo iskazali tabelarno broj iskontrolisanih ugovora o otkupu stanova, u skladu sa Zakonom o prodaji stanova na kojima postoji stanarsko pravo ("Sl. novine F BiH", broj 29/97, sa izmjenama), te u skladu sa Zakonom o vraćanju, dodjeli i prodaji stanova ("Sl. novine F BiH", broj 25/05 i 2/08).

Vrsta Predmeta	Prenešeno iz ranijih godina	Primljeno u 2024.g	Ukupno u radu 2024.g	Riješeno u 2024.g	U radu sud organ uprave	Postotak riješenosti
"Su" (stambeni)	0	11	11	5	6	45,45%

PREDMETI U PRIPREMI

Riječ je o predmetima u kojima zahtjeve za postupanje dobijamo od organa koje zastupamo u postupcima, shodno odredbama Zakona o pravobranilaštvu. Naime, u vezi sa svim vrstama pravnih pitanja, nedoumica u vezi sa pokretanjem parničnih postupaka, kao i u ostalim pravnim pitanjima o kojima se organi uprave obraćaju upitom, Pravobranilaštvo otvara predmete pripreme pred parnicu. U tim predmetima prikupljamo potrebne informacije i dokaze, te na temelju istih procijenjujemo i odlučujemo o neophodnim koracima, odnosno da li ćemo u konkretnom slučaju pokrenuti neki od postupaka pred sudom.

Vrsta Predmeta	Prenešeno iz ranijih godina	Primljeno u 2024.g.	Ukupno u radu 2024.g.	Riješeno u 2024.g.	U radu sud-a, organ-a uprave	Postotak riješenosti
"Pr" (priprema)	163	39	202	21	181	10,39 %

IZVJEŠTAJ O JAVNIM NABAVKAMA

za period od 01.01.2024. - 31.12.2024. godine

Pravobranilaštvo Kantona Sarajevo u 2024. godini provodilo je javne nabavke u skladu sa Zakonom o javnim nabavkama (Sl, novine BiH br.39/14, 59/22 i 50/24). Tom prilikom ugovoreni organ provodio je postupke konkurentskog zahtjeva za dostavljanje ponuda i direktnog sporazuma u skladu sa članovima 87. do 90. Zakona o javnim nabavkama i Pravilnikom o postupku direktnog sporazuma Pravobranilaštva Kantona Sarajevo vodeći računa o sredstvima koja su mu odobrena u Budžetu.

Član 87. Zakona o javnim nabavkama definiše:

“(1) Postupci javne nabavke za dodjelu ugovora male vrijednosti su:

- a) konkurentski zahtjev za dostavljanje ponuda; i*
- b) direktni sporazum.*

(2) Ugovorni organ sprovodi postupak konkurentskog zahtjeva za dostavljanje ponuda u slučaju da je procijenjena vrijednost nabavke robe ili usluge manja od iznosa od 50.000,00 KM, odnosno kada je za nabavku radova procijenjena vrijednost manja od iznosa od 80.000,00 KM, pri čemu ni ukupna procijenjena vrijednost istovrsnih nabavki na godišnjem nivou nije jednaka ili veća od 50.000,00 KM za robu ili usluge, odnosno 80.000,00 KM za radove.

(3) Ugovorni organ sprovodi postupak direktnog sporazuma za nabavku robe, usluga ili radova čija je procijenjena vrijednost jednaka ili manja od iznosa od 6.000,00 KM, pri čemu ni ukupna procijenjena vrijednost istovrsnih nabavki na godišnjem nivou nije veća od 10.000,00 KM.”

Ugovorni organ provodi postupak direktnog sporazuma za nabavku robe, usluga ili radova čija je procijenjena vrijednost jednaka ili manja od iznosa od 6.000 KM bez poreza na dodanu vrijednost. Pravilnikom o postupku direktnog sporazuma je propisana procedura za provođenje postupka nabavke putem direktnog sporazuma i definisano da se direktni sporazum smatra zaključenim:

- kod nabavki čija je vrijednost do 1.000 KM prilaganjem računa ili druge odgovarajuće dokumentacije;
- kod nabavki čija je vrijednost veća od 1.000 KM ugovorni organ je dužan zaključiti ugovor.

Direktni sporazum je članom 90. Zakona o javnim nabavkama definisan kao postupak u kojem ugovorni organ nakon ispitivanja tržišta traži pismeno prijedlog cijene ili ponudu od jednog ili više ponuđača i pregovara ili prihvata tu cijenu, kao uslov za konačan sporazum.

Izvještajem su obuhvaćene aktivnosti prema predmetu nabavke, vrsti postupka, vrijednosti ugovora, izbora dobavljača za dodjelu ugovora (ekonomski najpovoljnija ponuda).

U dole prikazanoj tabeli detaljno su prikazane značajnije javne nabavke koje je u izvještajnom periodu provelo ovo Pravobranilaštvo.

IZVJEŠTAJ O REALIZACIJI JAVNIH NABAVKI

Redni broj	Opis nabavke	Oznaka JRJN	Vrsta postupka	Vrijednost ugovora bez PDV-a	Datuma zaključenja ugovora/fakture
1.	Najam printera i usluge štampanja	79810000-5	Direktni sporazum	4400,00	Januar
2.	Nabavka kancelarijskog materijala	30192000-1	Direktni sporazum	5850,00	Januar
3.	Nabavka materijala za čišćenje	39830000-9	Direktni sporazum	3969,40	Januar
4.	Osiguranje zaposlenika	66510000-8	Direktni sporazum	1260,00	Januar
5.	Nabavka Dizel-a	09134220-5	Direktni sporazum	4000,00	Januar
6.	Godišnja članarina za pomoć na cesti	79980000-7	Direktni sporazum	80,00	Januar
7.	Ugovor o ovjeri godišnjeg obračuna za 2023. godinu	79211000-6	Direktni sporazum	500,00	Februar
8.	Pretplata na online izdanje Službenih novina	79980000-7	Direktni sporazum	205,13	Februar
9.	Pretplata na pravnu bazu podataka	79980000-7	Direktni sporazum	450,00	Februar
10.	Preplata za ZIPS i paket Sudska praksa	79980000-7	Direktni sporazum	683,76	Februar
11.	Pismonosne usluge	64112000-4	Direktani sporazum	1133,30	Februar
12.	Nabavka zavjesa	39515100-6	Direktni sporazum	448,41	Februar

13.	Tiskanje knjige protokola	22110000-4	Direktni sporazum	170,94	Februar
14.	Nabavka računara	30213300-8	Direktni sporazum	3645,00	Mart
15.	Seminar	80522000-9	Direktni sporazum	1130,00	Mart, April, Novembar
16.	Nabavka monitora	30231000-7	Direktni sporazum	1300,00	Mart, Oktobar
17.	Nabavka operativnog sistema	48624000-8	Direktni sporazum	1375,00	Mart, Septembar
18.	Objava oglasa	79341000-6	Direktni sporazum	1405,80	Maj, Juni
19.	Nabavka upisnika	79810000-5	Direktni sporazum	273,50	Maj
20.	Usluga servisa računara	50321000-1	Direktni sporazum	222,30	Maj
21.	Usluga zamjene guma	50112000-3	Direktni sporazum	168,94	Juni, Decembar
22.	Usluge popravke i održavanja vozila	50100000-6	Direktni sporazum	4000,00	Juni
23.	Usmjerivač zraka	42512500-3	Direktni sporazum	133,60	Juli, august
24.	Registracija vozila	71631200-2	Direktni sporazum	220,86	August

25.	Osiguranje vozila	66512100-3	Direktni sporazum	315,00	August
26.	Razvoj informacionog sistema za upravljanje predmetima i dokumentima i migracija podataka za Pravobranilaštvo KS	48000000-8	Konkurentski zahtjev	35000,00	August
28.	Objava tendera	79341000-6	Direktni sporazum	98,00	August
27.	Nabavka računara	30213300-8	Direktni sporazum	2430,00	Oktobar
28.	Nabavka omota spisa	22820000-4	Direktni sporazum	555,00	Novembar
29.	Nabavka telefona	32552100-8	Direktni sporazum	260,00	Decembar
30.	Nabavka skenera	30216110-0	Direktni sporazum	4991,45	Decembar
31.	Dnevne novine	22210000-5	Direktni sporazum	296,15	Za cijelu godinu

SISTEMATIZACIJA RADNIH MJESTA

Unutrašnja organizacija Pravobranilaštva Kantona Sarajevo uređena je Pravilnikom o unutrašnjoj organizaciji Pravobranilaštva Kantona Sarajevo broj: 53/17 od 16.06.2017. godine te dopunama Pravilnika 133/17 od 23.11.2017. godine i 112/19 od 12.04.2019. godine.

Poslovi iz djelokruga Pravobranilaštva Kantona Sarajevo vrše se u okviru sljedećih organizacionih jedinica:

1. Odjeljenje nosilaca pravobranilačke funkcije;
2. Odjeljenje za upravu, normativno administrativne, opšte, tehničke i pomoćne poslove.

1. Odjeljenje nosilaca pravobranilačke funkcije

Odjeljenje nosilaca pravobranilačke funkcije vrši poslove na osnovu Ustava BiH, Ustava FBiH, Ustava Kantona Sarajevo, zakona i drugih propisa i općih akata donijetih u skladu sa odgovarajućom zakonodavnom regulativom, u skladu sa nadležnostima iz Zakona o pravobranilaštvu (poslovi zaštite imovine i imovinskih interesa Kantona i njegovih organa, kantonalnih organa uprave, kantonalnih upravnih organizacija i stručnih službi i drugih institucija čiji je osnivač Kanton), te također vrši i druge poslove na osnovu Zakona o pravobranilaštvu.


2. Odjeljenje za upravu, normativno administrativne, opšte, tehničke i pomoćne poslove

Odjeljenje za upravu normativno administrativne, opće, tehničke i pomoćne poslove, organizuje i izvršava poslove u cilju što potpunijeg i efikasnijeg izvršavanja osnovne djelatnosti Pravobranilaštva Kantona Sarajevo, te izvršavanje ostalih prava i obaveza Pravobranilaštva Kantona Sarajevo utvrđenim odgovarajućim zakonskim propisima (izrada normativnih akata, izrada budžeta, poslovi iz radnog odnosa uposlenih), godišnji odmori, plaćeno odsustvo, poslovi pisarnice (prijem i otprema pošte) vodi upisnike, ažurira spise, arhiva predmeta, poslovi AOP (automatska obrada podataka), obrada i priprema predmeta, obračun i kontrola ugovora, finansijsko računovodstveno poslovanje, rad sa strankama i drugih poslova po naređenju Pravobranilaštva koji doprinose efikasnijem radu Pravobranilaštva Kantona Sarajevo.

U skladu sa Pravilnikom o unutrašnjoj organizaciji Pravobranilaštva Kantona Sarajevo broj: 53/17 od 16.06.2017. godine te dopunama Pravilnika 133/17 od 23.11.2017. godine i 112/19 od 12.04.2019. godine, u Pravobranilaštvu Kantona Sarajevo sistematizovana su 23 radna mjesta, kao u slijedećem tabelarnom prikazu.

Sistematizovana radna mjesta	Broj mjesta
Pravobranilac	1
Zamjenici pravobranioca	7
Sekretar Pravobranilaštva	1
Šef unutrašnje organizacione jedinice	1
Stručni savjetnik	2
Stručni saradnik	1
Stručni saradnik za ekonomske poslove	1
Viši referent – tehnički sekretar	1
Viši referent za računovodstvene i druge poslove	1
Viši referent za parnične i izvršne poslove	2
Viši referent za poslove pisarne	1
Referent za dokumentaciju - arhivar	1
Viši referent - daktilograf	1
Pomoćni radnik	1
VKV - Vozač	1
Ukupan broj sistematizovanih radnih mjesta	23

Pravilnikom o unutrašnjoj organizaciji Pravobranilaštva Kantona Sarajevo, predviđeno je, dakle, jedno mjesto pravobranioca, sedam mjesta zamjenika pravobranioca, šest državnih službenika i devet namještenika.



OCJENA STANJA I POSTIGNUTI REZULTATI

Analizirajući rad i rezultate rada Pravobranilaštva Kantona Sarajevo tokom 2024. godine, može se zaključiti da je Pravobranilaštvo Kantona Sarajevo, u odnosu na ranije godine, ostvarilo izuzetne rezultate posebno uzimajući u obzir aktivnosti ovog Pravobranilaštva na poslovima zaštite imovine i imovinskih interesa Kantona Sarajevo, što se najviše ogleda u visokom procentu naplate potraživanja na osnovu pozitivno ihodovanih sporova, što je rezultat predanog rada nosilaca pravobranilačke funkcije, kao i svih zaposlenih u Pravobranilaštvu Kantona Sarajevo. Takođe iz ovog Izvještaja može se utvrditi, da je Pravobranilaštvo Kantona Sarajevo u izvještajnoj godini, kako zastupanjem pred sudovima i drugim organima, tako i kroz davanje prethodnog pravnog mišljenja i obavljanja drugih poslova iz okvira nadležnosti, te pružajući pravnu pomoć, pa i dalje usljed očitog nesrazmjera u broju predmeta naspram broja nosilaca pravobranilačke funkcije i obavljanja svojih zadataka, održao visok nivo rada i postignutih rezultata.

Smatramo da je ovo Pravobranilaštvo u izvještajnom periodu, kao i prethodnih godina, krajnje profesionalno i uspješno obavljalo poslove zaštite imovine i imovinskih interesa Kantona Sarajevo i pored velikog broja pritisaka koji su usmjereni na rad ovog Pravobranilaštva, a imajući u vidu i činjenicu da u punom kapacitetu zastupa i štiti imovinu i imovinske interese općine Ilijaš.

Pored priliva novih i prisustva veoma složenih predmeta iz ranijih godina koji zahtijevaju poseban pristup, vrijeme za proučavanje činjenične i pravne situacije, izuzetno širokog dijapazona djelovanja ovog organa i kontinuiranog proširivanja nadležnosti Pravobranilaštva drugim propisima, svi poslovi su se u izvještajnom periodu obavljali ažurno i blagovremeno, stoga smatramo da je ovaj organ opravdavao svoju funkciju.

SARADNJA PRAVOBRANILAŠTVA SA ORGANIMA KOJE ZASTUPA

Saradnja Pravobranilaštva Kantona Sarajevo sa svim organa uprave, Javnim preduzećima i institucijama čiji osnivač je Kanton Sarajevo se poboljšala u izvještajnoj godini. Primjećujemo da su organi sa kojim surađujemo ažurniji u dostavljanju tražene dokumentacije a što je rezultiralo kvalitetnom i otvorenom saradnjom.

Ovdje smatramo bitnim naglasiti da se saradnja ne odnosi samo u postupcima zastupanja, dakle saradnja nije fokusirana samo na određene predmete u kojim se Pravobranilaštvo Kantona pojavljuje kao zakonski zastupnik Kantona Sarajevo ili njegovih organa. Saradnja se jednako tako ogleda i u održavanju velikog broja sastanaka na kojima prisustvuju predstavnici Pravobranilaštva radi davanja potrebnih pravnih savjeta, smjernica i uputa, a sve radi donošenja pravilnih zaključaka i odluka koji će biti u najboljem interesu Kantona Sarajevo.

Shodno članu 3. Zakona o pravobranilaštvu ("Sl. novine Kantona Sarajevo", br. 33/2008 - prečišćen tekst, 7/2012, 44/2016 i 45/2021) državni organi, preduzeća (društva) i druga pravna lica dužni su Pravobranilaštvu dostavljati podatke i obavještenja o ugrožavanju, narušavanju ili osporavanju prava i stvari u vlasništvu Kantona radi preduzimanja pravnih radnji i sredstava za koje je Pravobranilaštvo ovlašteno, te na zahtjev Pravobranilaštva, dostaviti podatke, obavještenja i spise koji su mu potrebni za preduzimanje radnji za koje je ovlašteno, o čemu navedene institucije trebaju naročito voditi računa, kako bi se izbjegle situacije u kojima bi Pravobranilaštvo, ne svojom krivicom, bilo dovedeno u situaciju da eventualno ne zastupa neki od organa na adekvatan način.

Ovaj organ će u cilju zaštite imovine i imovinskih interesa Kantona Sarajevo, a naročito u sudskim postupcima, održavati dobru poslovnu saradnju sa organima Kantona Sarajevo, te težiti uspostavi još kvalitetnije odnose, a sve u cilju stručnije zaštite imovine i imovinskih interesa Kantona. Ovo naročito kada se imaju u vidu odredbe Zakona o parničnom postupku FBiH i poštivanje zakonskih rokova, koji su prekluzivni, po kojem se na pripremnom ročištu moraju istaći sve činjenice i

dostaviti svi dokazi, tako da je organ koga zastupa Pravobranilaštvo, obavezan dostaviti Pravobranilaštvu izjašnjenje na činjenične navode tužbe, kao i sve dokaze koje posjeduje.

Kao svoju prednost u budućnosti ovaj organ vidi upravo u blagovremenoj, kontinuiranoj, efikasnijoj poslovnoj saradnji, a sve u zajedničkom interesu, a to je ishodovanje pozitivnih rezultata kao i zaštita imovine i imovinskih interesa Kantona Sarajevo.

PROGRAMSKA ORJENTACIJA ZA NAREDNI PERIOD

U ostvarivanju principa ustavnosti i zakonitosti i ostvarivanju funkcija i zadataka koji proizilaze iz Zakona o pravobranilaštvu, aktivnosti Pravobranilaštva će i u narednom periodu biti usmjerene na:

- poduzimanju mjera i aktivnosti radi pravne zaštite imovine i imovinskih interesa Kantona Sarajevo;
- u saradnji sa drugim organima (tužilaštvo, sud i dr.) osigurati najveći stepen pravne zaštite imovine i imovinskih interesa Kantona Sarajevo;
- afirmisanju svih vidova preventivne djelatnosti, kao što su sporazumno rješavanje spornih odnosa;
- kontinuirano praćenje pojava i problema u vezi primjene zakona u praksi, te inicirati putem nadležnih institucija izmjene istih;
- osigurati saradnju sa federalnim organima i drugim organima, sa pravobranilaštvima na svim nivoima radi ujednačavanja prakse i zauzimanja stavova po istim ili sličnim pravnim pitanjima;
- intenzivirati svoje aktivnosti na ukazivanju Skupštini i Vladi Kantona Sarajevo na uočene pojave i probleme koji ugrožavaju i narušavaju imovinu Kantona Sarajevo, a do kojih saznanja bude dolazilo kroz rad na predmetima, kao i kroz podatke i obavještenja koja dostavljaju državni organi, preduzeća i druga pravna lica, te davati prijedloge za sprječavanje istih;
- inicirati aktivnosti na ažuriranju evidencije o imovini Kantona Sarajevo u saradnji sa svim organima kojima je povjereno korištenje imovine Kantona Sarajevo;
- pokretati postupke radi upisa stvarnih prava u korist Kantona Sarajevo i pristupiti knjiženju nekretnina u zemljišnu knjigu;
- stalnoj edukaciji nosilaca pravobranilačke funkcije i drugih uposlenika putem savjetovanja, seminara, te kroz kontinuirano praćenje sudske prakse i nove zakonske regulative.

Konačno, kako je implementacija informacionog sistema upravljanja predmetima u toku neophodna je edukacija zaposlenih na korištenju istog, čime će se doprinijeti efikasnijem načinu upravljanja podacima kojim ovaj organ raspolaže, a s obzirom da je u pitanju veliki broj predmeta kojim se Pravobranilaštvo zadužuje (parnice, izvršenja, vanparnice, mišljenja, takse i sl...) smatramo opravdanim prednje navedno, što u konačnici olakšava i unapređuje rad Pravobranilaštva u cilju zaštite imovinsko pravnih odnosa Kantona Sarajevo.

v.d. PRAVOBRANILAC KANTONA SARAJEVO

